

職方典第一千四百六十六卷

雲南府部藝文一

石淙賦

并序

明李東陽

窪菴楊先生應寧先世在雲南其地曰石淙及遊寓巴陵卜築京口皆以名其所居其入而仕於朝出而官於外語述題識亦以空名繫之文字之間示不忘也予嘗泛大湖渡長江山川情狀概於心目雖未獲觀所謂石淙者愛其名悉其所懷爲述短賦主於體物叙事兼比興之義固不敢擬古作者然同心之言同應之聲君子或有取焉其亦先生之意也哉其辭曰

聳山谷兮峭嶸中潺湲兮水聲初灑涓以汨滴忽澎湃兮砰訇或在遠以疑近恆自昏而徹明感天機於一觸衆竅爲之不鳴信江南之絕境乃物類之至精彼濕布兮可擬曷蹄涔之足稱爰有三南居士比象引義取石淙以爲名客從湖南而過者曰此非洞庭之波乎碧波千頃青山一螺揖靈秀於衡岳激清風於汨羅昔予之旣舛旣弁來遊來歌興懷於其水之丘寄迹於此山之阿揆風景於毫芒繫孰少而孰多居士不答如茲淙何又有自滇南而來者曰此非昆明之瀟乎平地仰噴從天

下垂建長江而直瀉指瀚海以同歸昔子之乃祖乃父生斯聚斯倏星移而物改方挹彼而注茲訝江山之不可復識抑疇是而疇非居士乃撫然而嘆曰嘻有是哉吾固知石之爲石淙之爲淙也吾方手拊鏜錯耳聞春撞應噫氣於大塊引希音於清商挾涼颿以助爽與皓魄而爭光達大觀於無外諒至美之難雙蓋將濯纓乎萬里之流振袂乎千仞之岡乃若東山在吳以象舊邦東坡在黃遂名四方彼二東者之偉績豈三南之敢望且夫石者吾知其爲堅淙者吾知其爲激匪徒觀物以適懷抑亦將身而比德蓋將礪我粗鈍蠲我宿癖滌塵垢於七情激芳華於六藉嗟人生之有涯見道體之無息彼羣分分類聚何物非兮太極殆不知石之爲淙淙之爲石也於是二客乃攜酒與琴游於淙上班荆稊坐林歌迭唱北南俱失主賓皆忘慨聚散之殊途顧行藏之異尚三人者各適其適眇不知其所鄉也

橫山水洞記

羅元禎

去會城而西幾三十里爲龍院諸村村凡八村之田凡若干頃田稅歲輸縣官凡若干石村故枕山而帶水水卽滇池也池低村地勢隱起差具傾倚狀可立上游走丸以故池水不可逆引而仰漑村

之貢山而田者無論愆陽卽旬日不雨土脉輒龜裂歲輒不登中歲他境稔而茲境不厭半菽民苦之村迤西三十五里爲白石崖崖故有泉其山形隱起則又高龍院諸村什九度崖泉可引而東以灌然橫山牆立於前岸然峭阻先是議鑿山之凹爲渠引泉踰山而東乃其山石脊而土麓石堅不可鑿議鑿其麓自西以跨於東五十有八丈村農合力率作紛若蟻之營垤踰歲訖無成績方伯敬亭陳公以省耕至問焉衆告之故公曰茲吾事而以疲若等吾爲若成之乃謀諸同寅計其費可三千金移議御史臺報可公檄掾尹德先何獻榮劉得先後繼董茲役曰德先汝往視疏鑿相度規畫以樹爾功洞高五尺廣二尺斷木如高廣之數以支顛圯功成徐易以石發帑儲如議數授之上下其工之直以廩焉曰獻榮汝往卒德先功曰得汝其嗣德先獻榮以督諸役之力者不力者已又檄舍人袁應登佐掾以轄羣工應登簡工之不習者請以礦夫代功可其請召朱禎輩二十人以屬應登余時參藩政同公往視指授向道分東西鑿鑿幾半而道不值予當入賀行念前功恐或棄之者公請於撫臺曹公雲山巡臺許公保字僉曰政在利民毋惜費毋憚勞其往督諸掾役毋墮前功各捐贖金佐工諸掾役矜奮如命道果直實隆慶壬申之二月十一日也邇始事庚午凡二歲易掾董

役者三掾以直盡告者五告卽議發先後五發帑發百有十金而訖功敬亭公曰吾可休矣公與時不甚合久欲乞歸會水洞未成而未決也明日遂謝事去獅岡陳公繼公愈益振策諸掾役尋以成功報靈竅朗關洞中可偃蹇行公復起掾尋源引白石崖溝山腰連山奄互得泉二十二道蜿蜒縈紆四千一百八十三丈廣盈尺深踰咫尺泉抱山而東赴若帶而綰若白龍挾雨偕山勢俱來若玉虹下飲潛入洞口而東出噴薄淪漣瀝瀦而渠分村之耕者需濡稼者需溉植者需滋畦者闢者需潤不雨而澤不禱而免於旱槁民甚便之而德諸公之功乃歌曰橫山之麓可屋可田白崖之泉可引可沿山麓可鑿伏流潺湲茲麓旣闢不淤不顛漑我稼穡充廩盈廛我公之績億萬斯年曷俎豆之以輸我虔鄒公名應龍長安人曹公名三暘宜興人許公名大亨安肅人皆起家進士敬亭公名善浙江錢塘人獅岡公名時範閩長樂人同嘉靖辛丑進士

金馬山賦

劉寅

薈收炳靈房星聚精超鴻蒙而合秀倏凝結而成形此金馬之山所以置靈輦而奠昆明也歟在昔神禹受命爰分九區表嶽鎮之崇崇隔方維之頓殊有岱有華抗東西以屹若曰衡曰恆界南北而

截如曠哉梁益併包坤隅功不假於疏鑿地獨鍾乎膏腴起層巒之嵯峨控南滇之故墟嶄嶄衍之
崑谷駕綿邈之方輿造父固莫施其銜勒王良亦難範以馳驅觀其蔓草垂巖尖峯批耳白月懸瞳
青松掉尾漬赤藩以湛露流汗溝之邈邇鑄莫待乎棠溪產非資於麗水形類騰驤之駉騶勢似振
鬣之駉騶過日影之須臾磨蒼旻於尺咫迨夫墟氣成雲噴沫起風障泥炫熒熒之彩霞縈繚煌煌
煌之流虹迅雷張其猛烈疾電助其威雄渴甘澍以注下卷拳毛之蒙茸疊嶂益翠巖崖增紅洞扉
啟廡閤之弘敞鶯聲響和鸞之玲瓏萬騎仰觀而辟易羣羣睨視而驚冲至於岌岌歸巍昭嶢嶢峯
或奔如驚或驟若突峻拔天脊峭削風骨翁翳森爽隱嶢嶢鬱香橫亘於百里擬長城之砢砢是宜
拱帝京之尊嚴障大藩以靈謐也或有野老詰余而言曰子徒見其小而不窮其大知其名而不究
其實吾將爲子陳之元黃肇分氓生量量若魚若蟲無識無知聰明問出命爲君師立一代之典章
成四海之雍熙嗟惟此邦視爲外彝境荒荒而泯泯水漫漫而瀾瀾姚姒置之不卽顧問商周鄙之
不遑保釐俾昏迷而弗悟竟風靡於侏僑楚命莊蹻劈地遠來自王於滇顧瞻徘徊君臣之分少定
天叔之典未諧漢武奮志勞民費財命張騫而遠出弭使節而虛回亦有孝宣不務大體慕神怪之

恍惚行禋祀之瀆禮王褒馳驛而西上僅致一奠而乃已遺祠廟於岳阿謾冥搜而遠紀唐畏嗟顛
之跳梁宋限大渡之涯浚元雖小康亦何足齒猗歟皇明撫有萬方聖神文武巍巍堂堂既底寧於
華夏遂有事於戎荒命矯矯之虎臣揮天戈而奮揚直指雲南掃除梟獍截長鯨之髻豎剗妖狐之
肺腸顯允黔寧知勇忠良或已施於戡定思復盡於胥匡化強梗爲禮義變椎卉爲冠裳揖讓之風
濟濟絃誦之聲琅琅紹述前烈適有惠襄招攜貳以誠信鎔頑嚚以慈祥國公繼之綱紀益張載平
安南功業彌昌總制仁賢淑旂綏章來鎮來臨克柔克剛致遠人之盡服邁前哲而有光俾金馬迴
然而特立與碧雞相對而相望小姑息之宋元陋怯弱之漢唐夫然後知皇明之盛德冠古今而莫
並紀昭靖之殊勳垂悠久而不忘余聞其言拜跪嘆嗟遂爲之歌曰金馬之旁兮有稻有秔金馬之
陽兮有郭有城臣旬宣其善政兮民勤事乎農耕咸矢心而弗渝兮願永享夫千萬年之太平

登城西臥龍岡弔忠武侯賦

俞汝諧

嗟西峯之翠嶺兮乃橫峙而爲岡夾二水之渺瀰兮亦合流而成江允茲地之秀偉兮頓振衣而徜徉
曰莊躋之裔土兮匪夫子之故鄉豈前修之或累兮乃藉名於南陽緣破竹於三巴兮遂耀武於

遐荒咄恃險之百蠻兮寧知夫約法之三章爰渡瀘於五月兮尋駐兵於山陽既懾伏於威楚兮復
震疊於永昌勞七擒而七縱兮不欲以猛而勝剛惟以德而柔遠兮豈倖功者之可望不留兵將貽
之以安兮展也王度之汪洋垂休澤於百世兮頌鴻烈於不忘登故壘而緬懷兮嗟水碧而山蒼憶
抱膝於隆中兮永笑傲於羲皇匪隆禮於三顧兮肯幡然而就湯旋相投於魚水兮萃精神於一堂
乃立家於荆楚兮乃開基於蜀邦既南徼之鼠竄兮斯北向而龍驤作木牛與流馬兮又何慮乎乏
糧揚旌旗於六出兮凜八陣之堂堂雄辯驚於仲謀兮妙略服乎周郎氣吞老瞞之奸兮勢奪司馬
之強射張郃於木門兮摧郝昭於陳倉據前驅之夏侯兮斬後襲之王雙運神謀之莫測兮互萬古
而彌光何史氏之懷懟兮謂將略之非長唯天命之既棄兮故大志之莫償抑有數之使然兮匪人
謀之弗臧曰論定於千年兮與伊呂而頡頏豈管樂之可儔兮尙不足於平良緣先生之窮居兮由
靜而得爲學之方致謹於義利之辨兮有以陋五霸而樂三王識之高復養之粹兮宛孔氏之行藏
處足以包乎千古兮出欲以正乎三綱明漢賊之不兩立兮以順逆爲存亡斯天討之所由奮兮大
義之所由彰矧宅心慄乎嚴畏兮蒞政極於周詳德澤盎如陽春兮號令肅乎秋霜倘三年之不死

分固足以成一統之封疆脫斯民於水火兮躋斯世於平康志實足以相副兮才允足以相當何曠達之能興兮何元虛之能昌四海何由而分裂兮符劉何由而跳梁噫公忠之能畢兮寧不有超兩漢而媲周商胡身以勞而瘁兮壽以國而戕兵未至於洛兮星遽隕於房茲事理之不可知兮獨奈何乎彼蒼嗟乎公不可作矣然續著於萬里之外而不泯名垂於千載之下而彌香尙使人觀河洛而興思想遺愛於甘棠視彼莽操溫懿之徒恣暴橫於一時倏影滅而塵颺又奚啻麒麟之與犬彘鵲之與鳳凰

石淙對

崔詵

太宰竈翁楊先生生於滇南徙於湖南家於江南江表有屋命曰石淙石淙者滇之勝也客曰地以域分域以名定取滇名江古與豫生曰有之昔周扁濂溪著其鄉也呂書東萊追其先也著其鄉則思爲之重是故有弗辱也追其先則思爲之紹是故無弗肖也弗辱曰仁肖曰孝仁且孝其唯君子乎客曰賢不遺位而成名智不遐行而滅德翁方居巖廊之上乃耽山水之僻襲居士之迹殆不可歟生曰奚爲而不可也夫無累者弛張易省緣者去就決甘淡泊者紛華不移守退讓者勢利不亂

故大鵬搏扶搖擊南溟者適而已龍可豢而食之者欲而已昔伊尹成功而罔居周公攝政而思明
農懼盈之災也唯君子不有成不枯位於是乎業著而道尊奚爲而不可也客曰然則翁將隱歟生
曰未可也君子之於世無去無就唯道之從介士甘遜迹以遂高退士務匿名以避咎志士求危身
以著節義士樂奮勇以垂聲四行不同夫中一也臣之事君其交有淺深焉其任有輕重焉其受恩
有厚薄焉不合而去不敢竊祿此初仕者處常之法也大臣則異故交深則必懋其德任重則必安
其業恩厚則必永其祚知消息盈虛之幾貴豫處治忽安危之繫貴慎是故汲黯寢淮南之謀直也
韓琦平內間度也司馬光改法寶也夫大臣者國之寄未可遽言隱也客曰元結寄義於七泉張詠
表德以乖崖石淙之義將是類歟生曰然吾聞陰陽之氣凝者爲石流者爲水凝者無變信也流者
無滯知也石體乎順故可器水止於內故不可禦孔惡其硯孟非其激在人也亦然唯信能立以通
行則不窒唯智能運以正出則不流是故有惻怛之情曰仁存而不妄曰誠行而不跲曰才因勢曲
成唯中是經曰權發於仁體於誠斯盡信矣周於才達於權斯盡智矣此之謂大備是故可以立己
可以事君可以權出處可以正天下備之至也

雲南平諸彝碑

趙汝滌

兵部尙書都察院右都御史兼理軍務紹興呂公開府雲南之又明年爲嘉靖丙寅土酋鳳繼祖以武定叛劫殺自恣惡燄薰逼公召羣公而諭之曰賊祖黷亂國經往者務爲姑息以致諸彝倣倣漸不可長於是奏聞天子降旨俞允命至之日主餉督兵各奉其職戎器旣備師徒旣簡禡纛滇池分哨而進列陣如雲呼聲動地逢賊於武定我師奮勇衝突虜營矢鋒雨集砲聲雷鑄百里之內原草爲赤公乃協於元戎叅於臺史躬蒞大軍親壓敵境藩臬大僚矢謨先後文武闔帥闕如虢虎熊羆十萬縱橫膠轕兵鋒節束行伍篋密飛鳥不過螻螟不通賊乃計窮奔逸泳江入蜀衆謂賊旣過江地涉別省茫茫林箐無迹可攻力排羣議定策造舟羽檄星馳戒令速發憲臣聳聽將士誓死金炮掀天旌旗蔽日履險如夷直趨姜堡招徠嚮導圖寫地形望影揣情知賊不遠公運籌遙授警戒軍中將士翻然抖擻介冑是夜果有三千餘賊衝刦官營我師有備擒斬百餘大呼追逐墜崖落澗者無算遂乘勝尾賊至會里寨公又飛檄指示幾微恐有伏賊道旁乘隙比軍入葛可山賊果有伏我軍先覺遂大破之直擣蒲桃村燬賊營千餘間斬伐林箐一十三處繇是刮野掃地莽翳如濯鬼無

隱跡物無遁形四面夾擊不容綫罅逆賊繼祖與惡黨卞大才阿方等一時授首先是繼祖之黨姚安則有姚鈞易門則有王一新首尾相應將爲禍階公以通幽洞冥窮神觀化之力早知其然用兵方半卽縛姚鈞兵功初成隨斬一新四兇旣除諸羣膽落餘黨降者釋之復業凱歌而旋萬姓謹迎山川草木蔚有佳氣奏捷上聞飲至論功粵稽往事元江興師無成而罷東川用武竟非我功遂使甌裘生心狂彝攘臂殆非所以示天下也我公蒞止申明國法誅削羣兇不一而足甲子之夏斬僭號二賊於昆陽秋斬奚本等三賊於祿納冬擒者索於新化州乙丑誅虧遮於尋甸昔之蜂屯蜎集者旣一掃而空乃今深根固蒂者又一戰而拔自此當寧無南顧之憂揆之武侯在漢勳著南征今日駿功誠不多讓昔周宣之世方叔元老克壯其猷詩人歌功乃列於雅而我公希有之績歌詠未作非甚闕典歟濂與閩郡文武官屬縉紳士人采摭實跡會衆合詞撰詩一通勒石於點蒼山庶垂警於無窮以俟太史氏之采錄云詩曰天挺哲人加志窮民職大司馬不私其身位高任重夙夜惟寅曰此南服寇壤與鄰聖人在上四彝來賓乃爾小醜敢云不臣爰聲其罪爰整其旅彼兇僭號何如腐鼠一擒雙孽無煩再舉其時伊何孟夏載暑是歲之秋楚雄告憂螭斧蜩鋒掩縣乘州曾不逾

時亦既翦劉沔寒之節有豕載唾一磨斃之遂傾其穴乙丑之年羣盜蟬聯禍延尋甸一郡騷然運籌得當弓不張弦以俘其醜弔此顛連我公王佐皇風是播視金如土賤貨猶唾除兇翦亂風掃電過奈何頑曾不知悔禍罪釁滔天海山非大公用震怒歷告羣僚是決不悛合覆其巢爾整師徒爾備弓刀載爾糧糗忠藎是昭歲臨丙寅夾鐘之月福嶽滇池公秉其鉞紀律嚴明廳火奮越旌旗獵獵誓師喋喋雄風變變駭電書軍威所吞千里震懾既與寇逢衝擊先登怒厲激發颿起雷騰矢鋒簇雨戟火流星羽騎奕奕戰象稜稜聲動天地響破岡陵賊魄既褫莫敢回視扶傷而東泳江潛寄我乃造舟直窮其地彼曾既藏我師如鷺越歷再旬檢蒐畢至賊冒萬死奮其螳臂欲當我車千骸並棄殪彼二酋獻馘於轅大憝既除餘兇雞豚俘鈞於姚斬新易門西南頑梗獮薶無垠洞見千里一翳不存天威遠屆國勢斯尊往昔征彝半途而散綱紀爲弛彝乃屢叛古昔出師孔明在漢天威七擒廟謨神算千年誰追我公繼之通幽觀化神算無遺重泉匪敖九地非疑凡所指授動中機宜聿成峻功奚啻六奇我公體道文章之師我公遠猷虎臣之儀允又允武千載一時揆古無讓可無詠詩列郡安枕人孰不思吾儕土著桑梓於斯勒詞山石永鎮諸彝

湯池渠記

平顯

湯池渠肇始於洪武之內子時西平惠襄侯沐公在鎮以雲南師旅之衆仰給餉饋固備攻守用廣開屯田爲悠久計宜良在滇東南當陸涼路南喉襟旣置兵守必謀其食公相度原野舊有溝塍廣不盈尺注流弗遠湯水在旁人不知用底平撫撫棄爲荒隙不盡地產是年冬發卒萬五千荷畚鍤董以雲南都指揮同知王俊因山障隄鑿石刊木別疏大渠道洩於鐵池之竅而洑其袤三十六里闊丈有二尺深稱之逾月功竣引流公灌得腴田若干頃春秋穫實穎實粟歲獲其饒軍民賴之越二年公薨壬午夏旣芒種雨不時降人方爲憂獨宜良水利不竭首畢農事將校黎老益追慕公德咸願鐫石以紀頌於不朽丐銘於平顯銘曰湯池之渠宜良之利人食以生維公所施我公伊誰黔寧冢嗣善繼厥志奚啻一事渠流云云浸彼田穉勿罹勿勤冬有斂穧公雖云逝我思無替寫石斯礪憲於萬世

安寧溫泉記

張佳引

嘉靖丙寅十二月念三日余校士安寧畢將欲觀湯池先遣一力拏舟螳蜋川上厥明逕鹽井觀之

鹽官令竈丁以皮囊汲鹵水據晉常璩南中志云連然縣有鹽泉近志乃謂唐武德間因阿寧始掘地得鹵者非是觀畢屏輿從出大界村乘舟順流北行一里東望龍寶寺隱叢竹中亦蕭遠可喜舟子報郡吏馳騎率鼓吹追余亟遣去舟中望一山峻插東北隅兩峯如削凹其中如筆架形土人因以名山一名岱晟山一名坎山昔僧張善信有異術除妖坎山卽此又北行一里逕石淙渡故郡人楊少師一清築精舍讀書處詩文具集中一時名家則李長沙東陽陸上海深李北地夢陽最稱傑作沿兩岸土人引水溉田堰壩鱗次舟過若決吕梁水車高翻濺珠成雨似瀑水飛灑空中又北行五里水迴折作曲鉤形螳蜋川多直北流至此週繞二里逕龍山下山川窈窕松石參差最爲佳景東岸一帶巖石硿硿鏘鏘曹溪夜月四字稍下紅石削起鏘赤壁天成四字皆楊太史慎題也行半里七洞臨水飛巖峭立五綵絢雜洞口重高似雕藻再行半里至溫泉乃艤舟登其亭飯罷觀溫池而浴之池水皓潔纖毫不隱四面壁起不煩瑩甃中二石光膩勝玉碧色奪目華陽志云水神祠祀亦有溫泉顧祠今廢矣浴罷風乎亭上一峯對峙命觴相囑覺兩腋間習習風舉余嘗浴驪山香陵渝峽諸泉類多穢氣逆鼻太史品茲泉爲海內第一湯似非溢美時日且午聞西岸有聖水一名海

眼泉潮應子午卯酉之候亟渡而西登陸陟其所古木參雲水自竇中出盈盈溝澗土人謂此午潮至遂名曰聖水三潮不云四者子夜故不及見爾余曾觀泉華清宮下水出左右二竇應朔望不爽自是造化氣數茲泉無足異者又披荆榛南行一里至曹溪寺寺在龍山之麓土人一名葱山草逕盤歷可肩輿上無甚斗絕郡志云其山高八百丈週遭七十里誣矣寺殿因山層構中有楊太史碑文不減王簡栖頭陀之作第四級殿宇閎麗佛像莊嚴前行十弓許一樓顯敞右植木蓮花樹青葱可玩頰視螳螂川青碧如帶稍東一園鑿山石作几形桃杏薔薇屏架繁雜道上曝黼黻數石余呼僧笑曰僧家有是哉僧叩首若請罪狀余曰昔支道林好養鷹駿惜爾無大韻也觴出寺右一泉潺湲鳴亂莽間循泉散布南行一里許下有龍洞造其門下視深黑不測寒氣逼人投石其中逢逢成響七八疊而後止又西南步行可三里至龍潭乃水源處有二穴穴口多小魚山樹蒼鬱如蓋坐樹下飲水甘之頰瞰平疇如波文可愛指顧太華縈縈入背遠近奇峯錯列杖屨下問之名多鄙俚甚辱茲山也由東南下山復登舟逆水行夕陽旣下萬峯盡紫西望虎丘山寺與太極諸山碁布相屬復繫舟登岸里許至寺襟帶螳蜋枕藉虎丘信一靈境前殿榜曰妙果禪院殿制古麗畫壁精工非

時師可及相傳爲唐殿余觀之多元制也出山門南望郡中烟樹萬家暮靄如罩遂從陸歸時列炬在門矣返署中追憶斯遊操舟順流左右山色應接不暇濯足振衣登高睇遠而梵宮鐘聲洞口松濤所至奇出令人忘歸惜哉絕域往往好遊之士無因振策於烟水空翠之間茲遊蓋萬里奇蹤也遂秉燭記之

碧嶢精舍記

楊慎

滇海西斥舍舟登陸俗曰高橋稽之古志橋實曰嶢以山形似秦嶢關受此稱爾高嶢與碧雞相望如箭括毛東鎮氏有別廬在其下精舍之顏繇古定曰碧嶢憇獻客有疑而問於楊子曰茲嶢也繇知之繇號之如俗所不知何易諸已諸楊子曰無易仍爾也君子期人以雅不以俗待人以博不以陋昔者孔子之作春秋也經書善稻吳名則伊緩也經書太原狄名則大鹵也經書蚡泉狄名則矢胎也穀梁子曰號從中國名從主人范甯曰物類地形當從中國至於人名則從本俗楊子讀而詮之曰大哉孔子辨物正名奧哉穀梁啟蘊發隱號從中國故去大鹵伊緩矢胎而從太原善稻蚡泉也名從主人故介葛盧戎曼子皆不易矣慎往年執簡史局綱書藏室見洪武中有請以春秋兩漢